

## E mords Erfindung

Omm Sunndaach omm Stommdisch hawwe de Karl unn isch iwver dess Gebabbel vunnem Politiker mettere junge Fraa vom Stern geschwätzt, also nitt vumm Stern unne omm Moo, naa, vunn de Zeitschrift, die su haaße dut.

Waaßde, seet de Karl, isch bin fruh, dass isch su ald bin unn mett dene Sache nix mieh ze due habb. Weil ess werdd joo immer schlimmer mett dene Fraue, die sisch iwver uns Männer beschwern, odder nitt? Awwer wo issen eischendlich de Schorsch?

Der kimmt sischer noch, saach isch. Awwer uff doi Redd ze kumme: Ess dut aach vill Monnsbilder gewwe, die moone, dass gleich mett de Dier ins Haus falle kennde. Unn dess iss meisdens donn de Fall, wenn de Monn glaabt, weiler irschendebbes in soim Beruf geleisd hott, kennder sisch aach geescheiwver ooner Fraa was leisde, besonnere wennse gut aussehe dut unn villeischt aach noch jung iss. Donn werdd halt dumm geschwätzt unn wern Oodeudunge gemacht, die nitt su gons – frieher hott merr gesaad – stubenrein sinn.

Doo moont de Karl: Awwer Männer misse doch aach mett fremme Fraue babbele kenne, wie sollese mett dene sesommekumme, wennse nitt nor dumm Zeisch babbele wolle, naa, wennse villeischt moone, die Fraa wär was ferrs Lewe?

Dess iss was onnersders, saach isch, dess iss nitt dess vunn dem ewe geredd unn geschriwwe werdd. Awwer aach donn muss merr heit vorsichdisch soi, die Fraue sinn gewarnt.

Moont de Karl: Merr kann ewe aach lese, dass e Fraa sisch schunn beschwern dut, wenn enn Monn ihr uff de Ausschnitt guggd. Isch glaab awwer, dass e Fraa dess vorher waaß, dass im Dirndl die Aache vunn de Männer uff ihrn Buse lenke dut.

In dem Aacheblig iss de Schorsch onn de Disch kumme. Er hadd grad noch de Karl babbele geheert, seet Gude, setzt sisch newer uns unn dut lache.

Was lachsden?, frächt de Karl.

Doo seet de Schorsch: Isch habb gelacht, weil isch grad ferr dess Gugge e Erfindung gemacht habb.

Donn hott de Schorsch in soim Jackesäckel gegriffe unn hott ebbes erausgehollt, hott awwer de erst emol die Händ driwwer gehalle, dass merr noch nitt erkenne konnt.

Hier in moine Hond, seet de Schorsch, habb isch moi Erfindung ferr su Oogelischenheide wie de Karl ewe gesaad hott. Unn donn hotter soi Händ uffgemachd unn hott enn Brill uff de Disch geleschd.

Mir gugge unn sehn, dass die Gläser vunemm alde Brill vunn de Mitt nooch unne mett schwarz Babier zugeklebt hott, dann hotter soim gude Brill abgesetzt unn den onnern uffgesetzt, guggd unns oo unn frächt: Iss dess nitt e mords Erfindung? Weil mett dem Brill konnsde e Fraa in die Aache gugge, ohne in dere ihrn Ausschnitt schiele ze kenne, weil dess Schiele kenne mir Männer uns nimmi leisde. Aach ferr e Fraa iss su enn Brill gut, weilse emm Monn aach nor in die Aache unn nimmi uff die Hos gugge kann.

Schorsch, saach isch, dess iss werklisch e mords Erfindung, die mussde gleich zum Patent oomelle. Unn wie dusden doi Brill nenne?

De Schorsch war gons stolz unn seet: Die Brille für den korrekten Umgang zwischen Mann und Frau, zwischen Bruderlein und Schwesterlein.

Eiern Honnes